

Асквш 2018 мартІ а 22 агІан йакІвшаз  
Адуней апсуа-абаза конгресс  
VII айззара ду апны  
**ЙДРЫБАГЪЪАТІ**

**«Адуней апсуа-абаза конгресс»  
жвлара адкІылара**

**а-УСТАВ**

**(шЫцта йлырхыз)**

**СоГІвым къала  
Асквш 2018**

## **«Адуней апсуа-абаза конгресс» жвлара адкЫлары а-Устав**

### **1 астатйа. ЙАЛАКІУ АЪАЩАКВА**

1.1. «Адуней апсуа-абаза конгресс» жвлара адкЫлары (араъа йнанаркЫта – Конгресс) ари а-Устав йану амурадкви ахачІвкви дырхЫарныс дара ртахЫтарала тшадызкЫлыз акъралыгІвчва йгІандыршаз зхъа унашва ахъызцІахуа адкЫларапІ.

1.2. А-Конгресс адгалра-хабза лыхщата йаму жвлара адкЫларапІ.

1.3. А-Конгресс апсыуа бызшвала ахъыз – «Адунейизегътәи ацсуа – абаза конгресс»;

А-Конгресс абаза бызшвала ахъыз – «Адуней апсуа-абаза конгресс»;

А-Конгресс урышв бызшвала ахъыз – «Всемирный абхазо-абазинский конгресс»;

А-Конгресс англьыз бызшвала ахъыз – «World Abaza Congress»;

А-Конгресс трыкв бызшвала ахъыз – «Dünya Abaza Kongresi»;

А-Конгресс гІарып бызшвала ахъыз – المؤتمر العالمي للابازات

1.4. А-Конгресс анхара Апсны Республика а-Конституция, Апсны Республика апны йынхауа ахабзаква, адуней апны зымгІвагЫи здгылта йщаквгылу ахвитнагІаква рыпкъ йтата йакІвнаршитІ.

1.5. А-Конгресс анхара йащатапІ ауи йалу зымгІва рхвитнагІаквала йацапшызлара, ахабзанкъвгара, аргамра, ахъахвитра, ахъаунашвахъцІара.

1.6. А-Конгресс зтшын акъралыгІва щвъа йанырцІаз йгІашІарышвта юрист хъатата йаъапІ: а) йара йачІвыта баланс, сомгЫи валютагЫи злауцІа йауаш счет, ахабза йшгІанахІвауа апш йнарахвта ашвъа йанырцІаз дамыгъа, нып, вымпел датшагЫи алкІгІара агІарбагаква, абланкква, йара ахъыз зну амхІвыр амапІ;

б) йара ахъатачІвыра амазларныс, ауи ахъатачІвырала йнанауахвыз аборчква архЪйарныс йахвитпІ;

в) млыкв щата зму, млыкв щата змам ахвитнагІаква гІанарысабапырныс, аборчква архЪйарныс, асуд тшазынанархарныс, асуд, арбитраж суд, амакЫра алыргара ахъазла йацалырхыз асуд (третейск суд) рпны джъауап акЫрныс йауитІ.

1.7. А- Конгресс ъану: Апсны Республика, СогІвым къала, Лакоба йурам, 109 атдзы.

### **2 астатйа. А-КОНГРЕСС АМУРАДКВИ АХАЧІВКВИ**

2.1. А-Конгресс мурадта йамапІ:

- апсуа-абаза (абаза) йгЫи аубых уагІахъаква рэтноркультура ацзакЫра рыбагъъара;

- апсуа-абаза уагІахъа йрыуата агІвыма къралъква рпны йбзаквауа рыжвла ъану рпсадгЫыл йгІайхра ахъазла алшараква гІаныршара;

- Апсны Республика аэкономика, ауагІа рбзазаца агъьчІвра йазынарху ауысква, акультура ртшауацІыхра ацхърагІара;

- апсуа-абаза (абаза) йгЫи аубых уагІахъаква ртурых цІабыргы, руагІахъа лкІгІараква, рцІаскви рхабзакви гІащаквыргылхра.

2.2. А-Конгресс хачІвыта апахъ йаргылитІ:

- апсуа-абаза (абаза) йгьи аубых уагIахъаква рсоциал-экономика йгьи ркультура тшауацIыхра ацхърагIара;
- агIвыма къралъква рпны йбзазауа апсыуакви абазакви рцири бызшва гIащаквыржъра йгьи йддырдырра ахъазла цхърагIара рзыгIаныршара;
- агIвыма къралъква рпны йбзазауа апсыуакви абазакви рыжвла ъану рпсадгъыл апны йбзазауа ръахIыльчва гIараухра ахъазла цхърагIара гIаныршара, адиаспори ауат рыжвла ъану рпсадгъыли рацтаныхъвара рыбагъара йгьи тшауацIнарыхра;
- йапшым акъралъква рпны йбзазауа апсыуакви абазакви абардырра, рацзакIыра рыбагъара;
- рыжвла ъану рпсадгъыл йгIайхра зтахъу апсыуакви абазакви ауи ахъазла йатахъу цхърагIара рзадгалра;
- апсыуакви абазакви йъабзалакIгьи хвитнагIата йрыму гIаргвныргIврала, антахъгыт ауысквала цхърагIара хвыдъа йырзадгалра;
- апсуа-абаза уагIахъа йырпщылу аполитика, аэкономика, ахабзанкъвгара, атурыхдырра, аэтнография, акультура, арыпхъара датшагьи нархара зму анаука рхъвыхракв акIвыршара, ауи апш нхара акIвзыршауа анахъанат ауагIи анхартакви цхърагIара рзыгIаныршара;
- апсуа-абаза (абаза) йгьи аубых уагIахъаква рбзазара, рцIасква, рхабзаква йырзынарху агIвыраква гIацIщтра йгьи ауагIа йрылагара;
- апсуа-абаза (абаза) йгьи аубых уагIахъаква рдемография уысква агъьчIвра ахъазла амальква нахвра;
- гIвыра гIацIщтра;
- ажвлара хабаргагаква гIаныршара.

### 2.3. А-Конгресс аргвандзата йрыцынхитI:

- ХъахIара гIагра мурадта йызмам автоном адкIылара «Алашара».
- Трыквшта апны апсуа культура квтаква радкIылара (айшыста: АПСУАФЕД);

## 3 астатIа. А-КОНГРЕСС АХВИТНАГIАКВИ АБОРЧКВИ

3.1. а-Конгресс амурадкви ахачIвкви Апсны Республика ахабзаква йшгIархIвауа апшта йархъйауата йахвитпI:

- а) йара анхара йгIаквчважвауа ахабарква хвитта ауагIа йрыланагарныс;
- б) Апсны Республика ахабзаква йшгIархIвауа апшта акъралъыгIва, ашыпIа хъаунашвахъцIара руыснкъвгартаква щаквыргылра аннарахвуа ажва аланацIарныс;
- в) айззаква, амитингква, адемонстрацияква, амгIвайсраква акIвнаршарныс;
- г) ажвлара хабаргагаква гIаннаршарныс, гIвырагIацIщтра аднагалырныс;
- д) йара ахвитнагIаква, йалу ауагIа разыгIальаматраква акъралъыгIва, ашыпIа хъаунашвахъцIара руыснкъвгартаква рпны йахчарныс;
- е) ажвлара бзазара йапшым ауысквала акъралъыгIва уыснкъвгартаква тшырзыннархарныс, йара агIаджвыквцIараква рзыннардзарныс;
- ж) ажвлара адкIылараква руысла йаъу ахабзаква йгIартуа ахъгалраква абгата йгIанарысабапырныс;

з) йаъу ахабзаква йшгІархІвауа апшта а-Конгресс зыгІандыршаз жвлара магІны зму амурадква йырзынадзара ахъазла йатахъу хІаракъатчпара, агІвыма къралъквагъи гІаланакуата, йалалырныс. АхІаракъатчпара а-Конгресс а-Устав йану амурадква рырхъйара йазынхагІвацауата акІвпІ йаъазара шатахъу. А-Конгресс млыквнкъвгарала юрист хъата зму адкІылараква гІаннаршарныс йауитІ. А-Конгресс ахІаракъатчпара йгІанагуа ахъахІара а-Устав йгІанахІвауа амурадква рырхъйара ахъзла йгІадрьсабапра акІвмызтын а-Конгресс йалакву йрыларша йгъауам.

3.2. А-Конгресс анхара апны йаборчпІ:

а) Апсны Республика ахабзаква нкъвнагарныс, апсуа-абаза (абаза) диаспора ъабзазауа акъралъква рхабзаква мыгІвхънамгарныс, йара анхара йапщылата адуней апны зымгІва здгылта йынкъвыргауа ахабзаква тшырквнаргІапсырныс, ари а-Устав йану аъащаква архъйарныс;

б) ахъатачІвыра шгІанарьсабапуа ауысла аотчет йапшырныс зтахъу ауи апш лшара рнатырныс;

в) йазалху хъвдаквцІара зму ауысхарта ахІварала а-Конгресс аунашвахъцІара органкви аунашвачпагІвчви рщаквыргылраква анатырныс;

г) йазалху хъвдаквцІара зму ауысхарта (Апсны Республика аюстиция а-Министерства) агІащтийыгІв а-Конгресс йакІвнаршауа ауысква рпны даъазларныс данарыхвитырныс;

д) а-Конгресс а-Устав йгІанахІвауа амурадква шархъйауа, Апсны Республика ахабзаква шынкъвнагауа зырхъыхуа йазалху хъвдаквцІара зму ауысхарта (Апсны Республика аюстиция а-Министерства) ауысхагІвчва цхърагІара днарайдзарныс.

3.3. А-Конгресс Апсны Республика ахабзакви ари а-Устави йщаквдыргылуа антахъгъыт аборчквагъи архъйара атахъшпІ.

#### **4 астатйа. А-КОНГРЕСС ЙАЛАКВУ, АУАТ РХВИТНАГІАКВИ РБОРЧКВИ**

4.1. А-Конгресс йалата йырпхъадзитІ:

апсуа-абаза (абаза) йгъи убых уагІахъа йрыуу – йъабзалакІгъи, гІвыма къралъ йакъралъгІвызтынгъи – Апсны Республика ахабзала збалыгъ йнадзата а-Конгресс йалалыз.

4.2. А-Конгресс дасузлакІгъи йара йтахъыта далалитІ.

А-Конгресс йалалра зтахъу а-Устав 4.1. апункт йгІанахІвауа даквыргІапсызтын йара йахІвара швъала днарахвитІ. А-Конгресс алалра ауысла ахІвара швъа аратква рпны йаут йауитІ:

- а-Конгресс ЙхІаракІу асовет,

- а-Конгресс ашта йа ашыпІа хъвшара асовет,

- акъралыгІва йа администрация-шта гІаныршара апны йазалху хъвдаквцІара зму а-Конгресс ауысхагІв – уацІыхъван ауи ахІвара швъа а-Конгресс ЙхІаракІу асовет йырнапІыцІайыршвахуата.

А-Конгресс алазара йахІвауа днахвра ауысла щаквыргылра гІазгуа а-Конгресс ЙхІаракІу асовет йа ашта, ашыпІа хъвшара асовет ракІвпІ (ахІвара швъа ъартыз йгІаквхта). Ащаквыргылра напІщІыхрала йнарахвитІ (айхІарагІв напІы азыщІырхызтын) йгъи ашвъабгъы йанырцІитІ.

А-Конгресс алазара йахІвауа днармахв йауаштІ ауи ари а-Устав 4.1. пункт йану даквыргІапсымызтын йа 4.4. пункт ахъвы в) йгІанахІвауа апш уыс йнапІыцІшазтын.

ЙахІвуз а-Конгресс дшнармахвыз ауысла щаквыргылра назахуа а-Конгресс ЙхІаракІу асовет йа ашта, ашІыпІа хъвшара асовет ракІвпІ.

А-Конгресс дшнармахвызла ашта йа ашІыпІа хъвшара асовет ащаквыргылра амайкІуата йахІвуз ауи ащаквыргылра аннарахвра амщтахъ мшы 30 руацІа а-Конгресс ЙхІаракІу асовет тшазынайырха йауаштІ.

Ашшра ауысла А-Конгресс йнанауахвуа ащаквыргылра цІыхъвахитІ.

ЙхІаракІу асовет ащаквыргылра напІцТІыхрала йаргвану алачІвара апны йнарахвитІ.

4.3. А-Конгресс йалцІхуаш йара йгІвыз ахІвара швъала далырщтхитІ. А-Конгресс алцІхра ауысла ахІвара швъа а-Конгресс ЙхІаракІу асовет йа а-Конгресс ашта йа ашІыпІа хъвшара асовет йазищтий йауаштІ. Ауи ауысла а-Конгресс ЙхІаракІу асовет йа а-Конгресс ашта йа ашІыпІа хъвшара асовет щаквыргылра гІаргра гъатахъым.

4.4. А-Конгресс йалу а-Конгресс ЙхІаракІу асовет ащаквыргылрала арат ашвхІаусыгІваквала а-Конгресс далырщт йауаштІ:

а) а-Конгресс а-Устав йгІанахІвауа ймырхъйузтын;

б) а-Конгресс аунашвахъцІара органква а-Уставла хъвдаквцІарата йрыкву йырхъымсуата йнарахвыз ащаквыргылраква ймырхъйузтын;

в) а-Конгресс чва гвымха ахъызрысуа уыс (а-Конгресс йалу чва гвымха йхъызрысуа уысгъи алата) йхазтын.

г) а-Конгресс алазара ахъазла ашвачІвква йымтиуазтын (гІвысквша руацІа);

д) уыс йуырха дамуашта хабзала йщаквдыргылызтын.

А-Конгресс йалаз а-Конгресс дшалырщтызла а-Конгресс ЙхІаракІу асовет ащаквыргылра цІыхъвахитІ йаргъи а-Конгресс йалырщтыз йгІванхауата а-Конгресс далалхырныс дахвитначІвитІ.

4.5. А-Конгресс йалаз а-Конгресс дшалырщтуа ауысла а-Конгресс ЙхІаракІу асовет ащаквыргылра зтшын йнарахвыз йгІашІарышвта ауи далахымкІва йырпхъадзитІ.

4.6. А-Конгресс йшнарахвуа, йшалырщтхуа, а-Конгресс йалакву ашвъа йшанырцІауа а-Конгресс ЙхІаракІу асовет йарыбагъбауа а-Конгресс алазара ауысла Аъаца йщаквнаргылитІ.

4.7. А-Конгресс йалакву рхвитнагІаквали рборчквали йацапшыпІ.

4.8. А-Конгресс йалу дахвитпІ:

а) а-Конгресс анхара далазларныс;

б) а-Конгресс ахъвшара йалакІу айззара далазларныс;

в) а-Конгресс айззара ду даделегатта далырхырныс;

г) а-Конгресси йара дызлу ахъвшари рпны йалырхуа аорганква йрылазлуш алихырныс йаргъи ауаъа далырхырныс;

д) а-Конгресс анхара агъьчІвра ауысла ауи аорганква зымгІва рпны йажва алайцІарныс;

е) а-Конгресс органа йаму зымгІва йазцІгІараквала тшырзынайырхарныс, йалыргу джъауапгъи йауырныс;

ж) йатахъыта йпхъадзузтын – а-Конгресс дгІалцІхра.

4.9. А-Конгресс йалу йборчпІ:

- а) а-Конгресс а-Устав, а-Конгресс аунашвахъцIара органква а-Уставла хъвдаквцIарата йрыкву йырхъымсуата йнарахвыз ащаквыргылраква йгIархIвауа йырхъйарныс;
- б) а-Конгресс амурадкви ахачIвкви рырхъйара йазынарху анхара далазларныс;
- в) а-Конгресс дъалалыз йгъи дъалу ахъазла йщаквгылу ашвачIвква йтйырныс;
- г) а-Конгресс чва гвымха ахъызрысуаш уыскIгъи йымхарныс.

4.10. А-Конгресс йалакву а-Конгресс ашта, ашIыпIа хъвшараква рсоветква рпны ашвъа йанызлитI. Йъабзазауа ашта, акъралыгIва гIаныршара апны а-Конгресс ахъвшара аъамызтын ауат а-Конгресс ЙхIаракIу асовет а-Президиум ашвъа йанырцIитI.

## **5 астатIа. А-КОНГРЕСС АОРГАНКВА**

5.1. А-Конгресс йаорганта (араъа йнанаркIыта а-Конгресс аорганква) йалитI:

А-Конгресс аунашвахъцIара органква:

- Адуней апсуа-абаза Конгресс айззара ду.
- а-Конгресс ЙхIаракIу асовет.
- а-Конгресс ЙхIаракIу асовет а-Президиум.
- а-Конгресс ЙхIаракIу асовет АунашвачпагIв.

А-Конгресс анхара адызгалуа йгъи йзырхъвыхуа аорганкви ауысхагIвчви:

- а-Конгресс ЙхIаракIу асовет архъйагIв секретарь.
- а-Конгресс ЙхIаракIу асовет а-Перезидиум аппарат.
- а-Конгресс Аквта рхъвыхра комиссия.

5.2. Адуней апсуа-абаза конгресс айззара ду.

А-Конгресс рахIа йхIаракIу аунашвахъцIара орган Адуней апсуа-абаза конгресс айззара ду акIвпI, ауи хвысквша рпны зны ацкIыс ймачIымкIва а-Конгресс АунашвачпагIв йазиддитI.

5.3. Айззара ду апны акIвымкIва датша закIытагъи йуызнамахвуаш щаквыргылра лыхра анатахъу А-Конгресс йызкъазууым айззара ду азырддитI:

- а-Конгресс ЙхIаракIу асовет а-Перезидиум ащаквыргылрала;
- а-Конгресс Аквта рхъвыхра комиссия ажвала;
- а-Конгресс ахъвшараква рхпачIв ацкIыс ймачIымкIва айззара акIвыршара атахъыта ажва гIадыргылуазтын.

Йызкъазууым айззара ду ауи акIвыршара атахъыта зну ашвъа а-Конгресс ЙхIаракIу асовет йанадзара амщтахъ мызкIы ацкIыс йпасамкIва, хымызкI рацкIыс йкIъасамкIва йазырddара атахъыпI.

5.4. А-Конгресс айззара дугIваца злапшуа ауысква йрыуапI:

5.4.1. А-Конгресс а-Устав лыхра йа псахри нархъаги алацIара (ауи апш щаквыргылра айззара йалу хпа йчпата рыгIвба ацкIыс ймачIгIвымкIва напIы азыщтIырхуазтын йнарахвитI);

5.4.2. А-Конгресс амцIыщтхра йа алаца псахра ауысла щаквыргылра нахвра (ауи апш щаквыргылра айззара йалу хпа йчпата рыгIвба ацкIыс ймачIгIвымкIва напIы азыщтIырхуазтын йнарахвитI);

5.4.3. ЙхIаракIу асовет уагIата зъарагIв алазлуш (ашта хъвшарипхъадза ахъыла зъарагIвы алазлушгъи гIапхъадзахауата) рыбагъара, а-Конгресс ЙхIаракIу асовет хвысквшала йалхра, ауат рхъвдаквцIараква рпIатла тымцIскIва йрыквхра (ауи апш щаквыргылра айззара йалу ръарагIвшара ацкIыс ймачIгIвымкIва напIы азыщтIырхуазтын йнарахвитI);

5.4.4. А-Конгресс ЙхIаракIу асовет йаларцIаз дрыуата а-Конгресс ЙхIаракIу асовет АунашвачпагIв далхра (ауи апш щаквыргылра айззара йалу рьарагIвшара ацкIыс ймачIгIвымкIва напIы азыщIырхуазтын йнарахвитI);

5.4.5. Апсуа-абаза (абаза) йгьи аубых уагIахьаква йгIарылцIыз ауагIа ъабзазауа акьралькви аштакви рпны а-Конгресс ашта хьвшараква гIаныршара (ауи апш щаквыргылра айззара йалу рьарагIвшара ацкIыс ймачIгIвымкIва напIы азыщIырхуазтын йнарахвитI);

5.4.6. А-Конгресс анхара анархара хьадакви апрограммакви, а-Конгресс ахьатачIвыра агIаныршащи агIарысабапщи рыбагьара (ауи апш щаквыргылра айззара йалу хпа йчпата рыгIвба ацкIыс ймачIгIвымкIва напIы азыщIырхуазтын йнарахвитI);

5.4.7. А-Конгресс ЙхIаракIу асовети а-Конгресс Аквта рхьвыхра комиссии ротчетква рыбагьара (ауи апш щаквыргылра айззара йалу рьарагIвшара ацкIыс ймачIгIвымкIва напIы азыщIырхуазтын йнарахвитI).

5.5. Айззара ду а-Конгресс анхара йазынарху датша уыслагьи щаквыргылра нанауахв йауитI.

5.6. Айззара ду аделегатква ашта хьвшараква райззараква (рконференцияква) рпны а-Конгресс ЙхIаракIу асовет йщаквнаргылыз апхьадзараква рыпкъ йтата айззара ду анакIвшуш амшдза мшы 60 ацкIыс ймачIымкIва йаьаркIвата йалырхитI. Ашта хьвшарипхьадза ахьызла рахIа йанмачIу делегаткI айззара ду далазара атахьыпI. Ашта хьвшараква делегатта зьарагIв рщтиуаш ЙхIаракIу асовет аратква йгIарыквхта йщаквнаргылитI:

- ашта апны абаза йгьи аубых уагIахьа йрыуата йбзазауа рпхьадзара;
- ашта йауата а-Конгресс йалата ашвья йану рпхьадзара;
- ашта йгьи ашыпIа хьвшараква йаьи йаьами.

Аштаква рыхьызла айззара ду зьарагIв алазлуш ЙхIаракIу асовет йарыбагьаз «А-Конгресс айззара ду аделегатква алхра ауысла» Аьаща апкъ йтата йцIыхьвахуата йщаквзыргылуа ЙхIаракIу асовет акIвпI. А-Конгресс ЙхIаракIу асовет йаназаманыз апхьадзараква щаквнамьргылызтын ашта хьвшараква аделегатква ауи апхьала йакIвшаз айззара ду анадыргалуаз агIан а-Конгресс ЙхIаракIу асовет йарыбагьаз апхьадзараква йгIарыквхта йалырхитI.

5.7. Айззара ду анхара хабза щата амапI ауи ашта хьвшараква йалырхыз аделегатква рьарагIвшара ацкIыс ймачIымкIва йалазтын. Кворум аьазтын анщаквдыргылуа йдрыбагьаз апхьадзараква йрыквшвауата айззара ду анхара йалу аделегатква ракIвпI йырпхьадзауа. Йалырхыз аделегатква ашта хьвшара айззара (аконференция) ащаквыргылрала айззара ду анхара йалазлитI. Аделегатква айззара ду анхара йалазлара ахьазла ауат ашвья йанырцIитI. Ашта хьвшараква айззара ду йалазлуш аделегатква шалырхыз ауысла рщаквыргылраква айззара ду акIвшарныс жвыхвымшкI ацкIыс ймачIымкIва йаьаркIвата а-Конгресс ЙхIаракIу асовет йазырщтира атахьыпI.

5.8. Айззара ду апны ащаквыргылраква йхьтIу йа йхьгIву (айззара ду апны йщаквдыргылуа апшта) напIщIыхрала йнарахвитI.

5.9. Айззара дуква рбжьара а-Конгресс унашва ахьызцIауа органа йаьу ЙхIаракIу асовет акIвпI. ЙхIаракIу асовет а-Конгресс йалакву йгIарылырхитIта хвысквшала йалырхитI.

5.10. А-Конгресс ЙхIаракIу асовет а-Конгресс пышвтдья йынхауа йаорганпI.

5.11. А-Конгресс ЙхIаракIу асовет ръанатIаквала йалапI:

- а-Конгресс ЙхIаракIу асовет АунашвачпагIв;
- а-Конгресс ашта хъвшараква рунашвачпагIвчва.

А-Конгресс ЙхIаракIу асовет датшагьи йалазлуш арат апхъадзараква йгIарыквхта йалырхитI:

- Апсны Республика ахыла – цгIвы;
- Россия Федерация (Къарча-Черкес Республики Къабард-Балкъар Республики аламкIва) ахыла – пщгIвы;
- Къарча-Черкес Республика ахыла – пщгIвы;
- Къабард-Балкъар Республика ахыла – заджвы;
- Трыкв Республика ахыла – цгIвы;
- Европа ахыла – гIвуджъ;
- Египет ГIарып Республика йгьи Израиль КъралыгIва рахыла – заджвы;
- Иордан Хашимит ПаштахIыгIва ахыла – заджвы;
- Сирия ГIарып Республика ахыла – заджвы.

5.12. А-Конгресс ЙхIаракIу асовет алачIвараква йанатахъхара агIан йакIвдыршитI, ауат абадырга атехника амальква (конференц-айчважвара, Skype, WhatsApp, антахъгьит амессенджерква, айчважвага-абадыргаква) гIадрывабапуатагьи йакIвдырша йауитI. АлачIвараква цымызкI апны зны ацкIыс ймачIымкIва йакIвшалара атахъыпI. ЙхIаракIу асовет алачIвараква ЙхIаракIу асовет АунашвачпагIв йазиддитI. ЙхIаракIу асовет алачIвараква акIвзыршауа ЙхIаракIу асовет АунашвачпагIв йакIвпI.

5.13. А-Конгресс йхIаракIу асовет щаквыргылра лнахра ахъазла ауи алачIвара апны асовет йалу ръарагIвшара ацкIыс ймачIымкIва йаъазлара атахъыпI.

А-Конгресс ЙхIаракIу асовет ащаквыргылраква асовет йалакву рнапIщIыхрала йнарахвитI, айхIарагIв напIы ззыщIтырхызла – рыцIа щардагIвы йацыркIра атахъыта ари а-Устав йгIанамхIвузтын. НапIы щIызхквауа рбыжъква йацъарата тшагIвыршузтын ЙхIаракIу асовет АунашвачпагIв йажва алситI.

5.14. А-Конгресс ЙхIаракIу асовет:

5.14.1. А-Конгресс анхара ахчала, бзазага-техникала датшагьи йатахъула йаднагалитI.

5.14.2. Айззара ду йаделегатта зъарагIвы-зъарагIвы алырхуаш арыбагъытI.

5.14.3. Айззара ду ащаквыргылраква рырхъйара аднагалитI йгьи йархъвыхитI.

5.14.4. А-Конгресс йалалырныс зтахъу дшнармахвуала, а-Конгресс йалу дшалырщIхуала ащаквыргылраква нанауахвитI, а-Конгресс йнармахвыз рашшраква йрылапшитIта ауыла щаквыргылра нанауахвитI.

5.14.5. А-Конгресс ЙхIаракIу асовет АунашвачпагIв йажвала а-Конгресс абюджет йгьи ахча шгIадрывабапызла аотчет арыбагъытI.

5.14.6. А-Конгресс ахъвшараква гIаныршарала щаквыргылра нанауахвитI, ауат руысла аъащаква лнахитI.

5.14.7. Йара анхара ауысла а-Конгресс айззара ду апахъ джъауап акIитI.

5.14.8. Айззара дуи Аквта рхъвыхра комиссии рхъгалра йаланакIуа ракIвмызтын антахъгьит ауысквала щаквыргылра нанауахвитI.

5.14.9. «А-Конгресс алазара ауысла» Аъаща арыбагъытI (ауи апш щаквыргылра алачIвара йалу ръарагIвшара ацкIыс ймачIгIывымкIва напIы азыщIтырхуазтын йнарахвитI).



5.14.10. «ЙхIаракIу асовет а-Президиум ауысла» Аьаща арыбагъьитI (ауи апш щаквыргыла алачIвара йалу рьарагIвшара ацкIыс ймачIгIвымкIва напIы азыщтIырхуазтын йнарахвитI).

5.14.11. «А-Конгресс апшта хьвшара ауысла» Аьаща арыбагъьитI (ауи апш щаквыргыла алачIвара йалу рьарагIвшара ацкIыс ймачIгIвымкIва напIы азыщтIырхуазтын йнарахвитI).

5.14.12. «А-Конгресс айззара ду аделегатква ралхра ауысла» Аьаща арыбагъьитI (ауи апш щаквыргыла алачIвара йалу рьарагIвшара ацкIыс ймачIгIвымкIва напIы азыщтIырхуазтын йнарахвитI).

5.14.13. Ари а-Устав ауи йахьваквта йгIанахIвауа йгьи/йа айззара ду хьваквцIарата йазнаргылыз антахьгьыт ауысквала щаквыргыла нанаухвитI.

5.15. Йазалху Аьащаква ьадзанармахвс а-Конгресс аорганква зымгIва ари а-Устав йгIанахIвауала йынхитI.

5.16. А-Конгресс ЙхIаракIу асовет йалакву зымгIва рбыжквала йацапшыпI. НапIы щтIызхквуауа рбыжкква йацъарата тшагIвыршузтын ЙхIаракIу асовет АунашвачпагIв йажва алситI.

5.17. А-Конгресс ЙхIаракIу асовет АунашвачпагIв айззара ду апны ЙхIаракIу асовет йалалыз дрыуата далырхитI.

5.18. А-Конгресс ЙхIаракIу асовет АунашвачпагIв:

5.18.1. А-Конгресс айззара ду, а-Конгресс ЙхIаракIу асовети а-Конгресс ЙхIаракIу асовет а-Президиуми ралачIвараква акIвйыршитI

5.18.2. А-Конгресс ЙхIаракIу асовети а-Конгресс ЙхIаракIу асовет а-Президиуми дырхьадапI, ауат рынхара унашва ахьицIитI.

5.18.3. АзхьацIага швья йымамкIва а-Конгресс ахьызла акъралыгIва уысхартаква, ашIыпIа хьаунашвахьцIара аорганква, аполитика партияква, ажвлара адкIылараква йгьи антахьгьыт аорганзацияква дрыцынхитI, а-Конгресс агIвычIвгIвыс кIьыдакви аюрист хьатакви йрыщаквнаргылуа акъралыгIв-хабза азазаьащаква рпны а-Конгресс ахьызла дчважвитI.

5.18.4. А-Конгресс ахча ауысла ашвьяква рпны йапхьахауа амачв ацIайцIарныс дахвитпI, абанкква рпны а-Конгресс асчетква гIахьитIитI, азхьацIага швьяква гIайгIвитI, а-Конгресс ашвьяква зымгIва, а-Конгресс абланкква йрыквгIву атшазынархараква, асальамшвьяква мачвы рыцIайцIитI.

5.18.5. А-Конгресс йалу зымгIва йдырхьйара атахьу аунашвакв гIацIищтитI, а-Конгресс анхара йапщылу ауысквала унашва йчпитI.

5.18.6. А-Конгресс ахьызла ангIалраква адичпалитI, а-Конгресс ахьызла хачIвборч найахвитI.

5.18.7. А-Конгресс анхагIвчва нхарала ангIалраква рыдичпалитI.

5.18.8. А-Конгресс злу амлыкврхIара жвлараква ракионерква райззараква а-Конгресс ахьызла дрылазлитI.

5.18.9. Ари а-Устав йщаквнаргылуа антахьгьыт ахьваквцIараква йырхьйитI.

5.19. А-Конгресс ЙхIаракIу асовет архьйагIв секретарь а-Конгресс апштат йалу дынхагIвыпI, нхара А-Конгресс ЙхIаракIу асовет АунашвачпагIв йунашвала днарахвитI йгьи дакьвырщтитI.

5.20. А-Конгресс ЙхIаракIу асовет архьйагIв секретарь:

- а-Конгресс ауысқа зымға радгалра, рақвыршара, ршвқа агвыргівра йыхьвакпі;  
- а-Конгресс аунашвахьцара органқа йнарахвыз ащаквыргылаққа рырхьйара йырхьвыхиті;

- а-Конгресс ЙхІаракІу асовет Аунашвачпагів йунашвала джъауап ззикІуа ауысқа йрыланакІуа ахьвакціара кІыдаққа йырхьйиті.

А-Конгресс ЙхІаракІу асовет архьйагів секретарь а-Конгресс ЙхІаракІу асовет Аунашвачпагів йгайыйтуа азхьаціага швџала дынхиті.

А-Конгресс ЙхІаракІу асовет Аунашвачпагів йзыщаквыргылыз ахьгалраққа рыпкъ йтата А-Конгресс ЙхІаракІу асовет архьйагів секретарь а-Конгресс йалу зымға йдырхьйара атахьу ахьвакціараққа, аунашваққа ритырныс, анхагівчва гвыпкви анхара органкви гІаньыршарныс дахвиті.

5.21. А-Конгресс ЙхІаракІу асовет Аунашвачпагів, А-Конгресс ЙхІаракІу асовет йалакву, архьвыхра комиссия аунашвачпагіви йалаквуи рпІатла намдзасківа рхьвакціараққа ашІадрис йауашті:

а) рхьвакціараққа ныржъра шыртахьула ахІвара швџа ргівыта;

б) рзгівадара аџацала рхьвакціараққа рзымырхьйахуазтын;

в) а-Устав йану дмырхьйузтын;

г) а-Конгресс аунашвахьцара органқа ари а-Устав хьгалрата йырнатуа апкъ йтата йнарахвыз ащаквыргылаққа дмырхьйузтын;

д) а-Конгресс чва гвымха ахьызрысуа йгьи (йа) а-Конгресс амурадкви ахачІвкви йырпшІагылуа уыс рнапІыцішазтын.

Араџа йгіашІыпхьадзу ауысхагівчва рхьвакціараққа пасата йшашІадрисуала айззара дуква рбжъара щаквыргыла назавуа а-Конгресс ЙхІаракІу асовет акІвпі. А-Конгресс ЙхІаракІу асовет акІвпі зхьвакціараққа ашІасыз ауысхагівчва рборчқа а-Конгресс айззара дудза а-Конгресс ЙхІаракІу асовет йалакву рыуа йзырхьйуш щаквыргылуагьи.

5.22. А-Конгресс ЙхІаракІу асовет а-Президиум пышвтдџа йынхауа, гвыпла щаквыргыла лызхуа а-Конгресс йаунашвахьцара йгьи йархьйагів органпі. А-Конгресс ЙхІаракІу асовет а-Президиум йалапі:

- а-Конгресс ЙхІаракІу асовет Аунашвачпагів – ауи а-Конгресс ЙхІаракІу асовет а-Президиумгьи даунашвачпагівпі;

- а-Конгресс ЙхІаракІу асовет архьйагів секретарь;

- арат акъралькви аштакви йрыуата ЙхІаракІу асовет йалакву рыуа заджвы-заджв:

Апсны Республика, Трыкв Республика, Россия Федерация (Къарча-Черкес Республики Къабард-Балкъар Республики аламківа), Къарча-Черкес Республика, Къабард-Балкъар Республика, Европа, Египет Гарып Республика йгьи Израиль Къралыгіва, Иордан Хашимит Паштахыгіва, Сирия Гарып Республика.

- а-Конгресс анхара апны лкігІара зму анархаракқа унашва рхьырціарныс а-Конгресс ЙхІаракІу асовет Аунашвачпагів йыргылта зъанатІаквала ЙхІаракІу асовет а-Президиум йалазлара атахьу;

- «А-Конгресс ЙхІаракІу асовет а-Президиум ауысла» Аџаца апны йгіарбу антахьгыт ауысхагівчва.

5.23. А-Конгресс ЙхІаракІу асовет а-Президиум:

5.23.1. Йаму ахьвакціараққа рыпкъ йтата а-Конгресс унашва ахьнаціті.

5.23.2. Йаму ахъвакцIараква рыпкъ йтата акъралыгIва уысхартаква, ашIыпIа хъаунашвахъцIара аорганквa, аполитика партияквa, ажвлара адкIылараквa, антахъгыт организацияквa йрыцынхитI.

5.23.3. А-Конгресс анхара адгалра йапщылу ашвъаквa, аъщаквa арыбагъытI.

5.23.4. А-Конгресс ашта хъвшараквa рынхара нархара рнатитI йгъи йагвыннаргIвитI.

5.23.5. А-Конгресс йалакву а-Устав йгIанахIвауа шдырхъйауа архъвыхитI.

5.23.6. А-Конгресс йалакву йазакIу рреестр нкъвнагитI, алазара ахъазла ашвачIквa шыртийуа архъвыхитI. Алазара ахъазла ашвачIквa ртийри ртийра архъвыхри йырпщылу ауысквa «А-Конгресс алазара ауысла» Аъща йщаквнаргылитI.

5.23.7. А-Конгресс абюджет лнахитI, асквш ауацIа а-Конгресс ахча шгIадрысабапызла отчет арыхIазыритI.

5.23.8. А-Конгресс анхагIвчва рштат алаща арыбагъытI.

5.23.9. А-Конгресс айззара ду аднагалитI.

5.23.10. А-Конгресс йалу зымгIва рреестр нкъвнагитI.

5.23.11. Ари а-Устав, айззара ду ащаквыргылраквa рпны йгIарбу ауысквала – йазалхта а-Конгресс айззара ду йгъи ЙхIаракIу асовет йырхъырпшыру ауысква ракIвымкIва – щаквыргылра нанаухвитI.

5.23.12. А-Конгресс датша жвлара адкIылара йрылалуаши йрыламылуаши, млыкврхIара адкIылара, юрист хъата хвитнагIа зму ажвлараквa, хъахIара зму йгъи хъахIара йащтам аорганзацияквa гIаныршара ауысквала щаквыргылра нанаухвитI.

5.23.13. Датшата йанамуаш, ауыс ласыта йалыргара анатахъу агIан а-Конгресс ЙхIаракIу асовет АунашвачпагIв йажвала ашта хъвшара аунашвачпагIв йхъвакцIараквa ашIарысра ауысла щаквыргылра нанаухвитI.

5.24. А-Конгресс ЙхIаракIу асовет а-Президиум алачIвараквa йанатахъхара агIан, ауаса сквшыкI апны хын ацкIыс ймачIымкIва йадыргалитI. А-Конгресс ЙхIаракIу асовет а-Президиум ауысква йрылапшта щаквыргылра нанаухв йауитI ауи алачIвара апны а-Президиум йалу райхIарагIв аъзтын. Ащаквыргылраквa напIщIыхрала рыцIа щардагIвы напIы зыщIырыхыз гIарпхъадзауата йнарахвитI. А-Конгресс ЙхIаракIу асовет а-Президиум ащаквыргылраквa а-Президиум алачIвара апротокол йанырцIитI.

5.25. А-Конгресс ЙхIаракIу асовет а-Президиум абгата йъадзащаквымгылс ауи ахъвакцIараквa а-Конгресс ЙхIаракIу асовет АунашвачпагIв йырхъйитI.

5.26. Аквта рхъвыхра комиссия а-Конгресс айззара ду апны а-Конгресс йалакву йгIарылырхитIта хвысквшала йалырхитI. Акомиссия зъарагIв алазлуш а-Конгресс айззара ду йщаквнаргылитI.

5.27. Аквта рхъвыхра комиссия аунашвачпагIв а-Конгресс айззара ду апны а-Конгресс йалакву дгIарылырхитIта хвысквшала далырхитI.

5.28. Аквта рхъвыхра комиссия щаквыргылра нанаухв йауитI ауи алачIвара апны йалакву райхIарагIв аъзтын. Ащаквыргылраквa йхътIу напIщIыхрала рыцIа щардагIвы напIы зыщIырыхыз гIарпхъадзауата йнарахвитI.

5.29. Аквта рхъвыхра комиссия а-Конгресс млыкврхIарала анхара, амлыкв анквъгаши ашвъаквa рагвныргIвыщи архъвыхитI.

5.30. Аквта рхъвыхра комиссия йалакву а-Конгресс анхара йапщылу йамгIанхабарызлакIгъи гIаддырдырырныс йахвитпI.

5.31. Аквта рхъвыхра комиссия йызказууым а-Конгресс айззара ду аздара ауысла щаквыргылра нанаухвырныс йахвитпІ.

5.32. Йатахъхузтын Аквта рхъвыхра комиссия анхара аъагІвагІагІвчагъи гІаланажъырныс йахвитпІ.

5.33. Аквта рхъвыхра комиссия анхара ауысла а-Конгресс айззара ду апахъ джъауап акІитІ. Айззара дуква рбжъара Аквта рхъвыхра комиссия сквшыкІ апны зны аотчет а-Конгресс ЙхІаракІу асовет йазнацтийитІ.

5.34. А-Конгресс, ауи аорганква рынхара сквшыкІ апны зны ацкІыс ймачІымкІва йдырхъвыхитІ.

5.35. Аквта рхъвыхра комиссия йалу а-Конгресс йалырхуа датша органкІгъи далазарныс дгъахвитым.

5.36. Апсуа-абаза (абаза) йгъи аубых уагІахъаква гІащаквыжъри тшауацІдрыхри ауысла гІатгара дудзда зму агІвычІвгІвыс «Адуней апсуа-абаза конгресс ЧІахІра зму а-Президент» хъзы шйыхъырцІауала а-Конгресс ЙхІаракІу асовет ажвала а-Конгресс айззара ду щаквыргылра нанаухвитІ. ЧІахІра зму а-Президент а-Конгресс анхара дацхърагІитІ. ЧІахІра зму а-Президент а-Конгресс ЙхІаракІу асовет АунашвачпагІв йгІайытѳа азхъацІага швъала а-Конгресс ахъызла уыс йхарныс хвитнагІа йырт йауаштІ.

## **6 астатѳа. А-КОНГРЕСС АЛАЩА**

6.1. А-Конгресс злалу а-Конгресс аорганква, апсуа-абаза (абаза) йгъи аубых уагІахъаква йгІарылцІыз ауагІа ѳабзазауа акъралъкви аштакви рпны йгІаныршу, апсуа-абаза (абаза) йгъи аубых уагІахъаква йгІарылцІыз ауагІа йалакІыта йбзазауата йгІарыцІаркІуа аштаква рпны йынхауа а-Конгресс ашта йгъи ашыпІа хъвшараква ракІвпІ.

6.2. А-Конгресс ЙхІаракІу асовет ащаквыргылрала а-Конгресс ахъвкІыдакви ауысхартакви гІанырша йауаштІ.

## **7 астатѳа. А-КОНГРЕСС АШТА ЙГЪИ АШЫПА ХЪВШАРАКВА**

7.1. А-Конгресс ашта хъвшараква а-Конгресс ЙхІаракІу асовет ащаквыргылрала Апсны Республика, Россия Федерация, Къарча-Черкес Республика, Трыкв Республика, МарагІацІцІырта аргваны акъралъква, Европа, Великобритания, США, апсуа-абаза (абаза) йгъи аубых уагІахъаква йгІарылцІыз ауагІа ѳабзазауа антахъгъыт акъралъква рпны йгІандыршитІ.

Ашта хъвшараква а-Конгресс ЙхІаракІу асовет йарыбагъѳауа «А-Конгресс ашта хъвшара ауысла Аъаща» ащатала йынхитІ.

7.2. АшыпІа хъвшараква а-Конгресс ашта хъвшара ѳанхауа апсуа-абаза (абаза) йгъи аубых уагІахъаква йгІарылцІыз ауагІа йалакІыта йѳабзазауа ашыпІаква рпны а-Конгресс йалу 10-гІвы рацкІыс ймачІымкІва йнадзузтын ашта хъвшара асовет ащаквыргылрала йгІандыршитІ.

7.3. АшыпІа хъвшараква йѳану ашта апны йгІаныршу ашта хъвшара йаланакІитІ. АшыпІа хъвшара ѳадзагІандмыршас а-Конгресс йалакву йѳабзазауа апны йгІаныршу а-

Конгресс ашта хъвшара йалазла йауитІ, ауи ашта апны а-Конгресс ахъвшара аьамызтын Апсны Республика ашта хъвшара йалазла йауитІ.

7.4. А-Конгресс ашта йгьи ашыпІа хъвшараква акъралъ ахабзакви ари а-Устави йшгІархІвауа апшта юрист хъататагьи ашвъа тшанырцІа йауаштІ. Ашта йгьи ашыпІа хъвшараква акъралыгІва швъаква йырнырцІарныс ахъазла йырцтийуа ашвъаква а-Конгресс ЙхІаракІу асовет ащаквыргылрала а-Конгресс ЙхІаракІу асовет АунашвачпагІв дрыквшахІатхитІ. Ашта йгьи ашыпІа хъвшараква руставква а-Конгресс а-Устав йапшІагыл йгьяуам.

7.5. А-Конгресс ахъвшараква – юрист хъатата ашвъа йанызтынгьи йанымызтынгьи – дара разазъащаква рпынгьи а-Конгресси дари разазъащаква рпынгьи рхвитнагІаквалагьи рборчквалагьи йацапшыпІ. Йара ауи апшта а-Конгресс йалата ауат ахъвшараква йрылугьи рхвитнагІаквалагьи рборчквалагьи йапшыпІ.

А-Конгресс а-Уставла йынхауа ахъвшараква а-Конгресс ахъатачІвыра йаланхарныс йыртитІ. А-Конгресс ахъвшараква йрыдырбагъялу ахъатачІвыра ари а-Устави а-Конгресс ащаквыргылракви йшгІархІвауа апшта йызрыртыз ауысква рыхъазла йгІадрысабап йахвитпІ.

7.6. А-Конгресс ашта йгьи ашыпІа хъвшараква рхъваквцІараква нкъвырга йахвитпІ а-Конгресс ахъызла ЙхІаракІу асовет АунашвачпагІв йазалху анГІалра здичпалыз юрист хъатата ашвъа йану датша организацияквкІгьи.

7.7. Трыквшта апны а-Конгресс ашта хъвшара ахъваквцІараква а-Устав 7.6. пункт апкъ йтата анГІалра здырчпалыз Апсуа культура квтаква рфедерация йархъйитІ. Ауи анГІалра апны анахъанат ауысква йрылата Апсуа культура квтаква рфедерация (АПСУАФЕД) ари а-Устав 7.10. апункт шархъйушгьи ауыла хвитнагІата йамазлушгьи анырцІитІ.

Россия апны а-Конгресс ашта хъвшара ахъваквцІараква а-Устав 7.6. пункт апкъ йтата анГІалра здырчпалыз ХъахІара йацтам автоном организация «Алашара» йархъйитІ. Ауи анГІалра апны анахъанат ауысква йрылата ХъахІара йацтам автоном организация «Алашара» ари а-Устав 7.10. апункт шархъйушгьи ауыла хвитнагІата йамазлушгьи анырцІитІ.

7.8. А-Конгресс йалу зымгІва, запшхъвшарата йызланакІлакІгьи, а-Конгресс ЙхІаракІу асовет йарыбагъяз «А-Конгресс алазара ауысла» Аьаща йшгІанахІвауа апшта алазара ахъазла ашвачІквкв ртйитІ.

7.9. А-Конгресс ашта хъвшара рыцІа йхІаракІу унашвахъцІара органа йазалитІ сквшыкІ ауацІа гІван ацкІыс ймачІымкІва ашта хъвшара асовет аунашвала йазырдалауа ашта хъвшара йалакву райзара.

7.10. Ашта хъвшара йалакву райзара:

а) а-Конгресс ашта хъвшара асовет зъарагІв алазлуш щаквнаргылитІ;

б) ашта хъвшара йаланакуата а-Конгресс йалакву йгІарылнахитІта хвысквша йынхуш а-Конгресс ашта хъвшара асовет алнахитІ, ауи йалакву рпІатла алымгаскІва рхъваквцІараква ашІанарыситІ;

в) а-Конгресс ЙхІаракІу асовет азыразызтын ашта хъвшара асовет йалакву рыуа заджвы ашта хъвшара асовет даунашвачпагІвта хвысквшала далнахитІ, а-Конгресс ЙхІаракІу асовет азыразызтын йпІатла алымгаскІва йхъваквцІараква ашІанарыситІ.

г) ахъвшара анхара анархара хъваквкв щаквнаргылитІ.

д) ашта апны ахІбачва рсовет, апхІвысква рсовет, чкІвыныргІа руысквала асовет гІаныршара ауысла щаквыргылра нанауахвитІ, ауат рунашвачпагІвчва хвысквшала йалнахитІ, рпІатла алымгаскІва рхъваквцІараква ашІанарыситІ.

е) ахъвшара йалырхуа аорганква ротчетква йрыздыргІвитІ;

ж) ахъвшара акъралыгІва швъа йанцІара ауысла а-Конгресс ЙхІаракІу асовет штшазынадырхушла щаквыргылра нанауахвитІ;

з) а-Конгресс ЙхІаракІу асовет йщаквнаргылыз йазалху апхъадзара йахънамхІвауата а-Конгресс айззара ду аделегатква алнахитІ;

и) ашта хъвшара анхара йапщылу антахъгыт ауысквала щаквыргылра нанауахвитІ.

7.11. Ашта хъвшара йалакву райззара ари а-Устав йшгІанахІвауа апшта ашта хъвшара асовет йалакву, ашта хъвшара архъвыхра комиссия аунашвачпагІви йалаквуи рпІатла намдзаскІва рхъваквцІараква ашІадрис йауаштІ:

а) рхъваквцІараква ныржъра шыртахъула ахІвара швъа ргІвыта;

б) рхъваквцІараква абгата йырзымырхъйахуазтын;

в) а-Устав йану дмырхъйузтын, а-Конгресс алазара ахъазла ашвачІкква рымтийрагы алата;

г) а-Конгресси ахъвшари рунашвахъцІара органква ари а-Устав хъгалрата йырнатуа апкъ йтата йнарахвыз ащаквыргылраква дмырхъйузтын;

д) а-Конгресс чва гвымха ахъызрысуа йгыи (йа) а-Конгресс амурадкви ахачІккви йырпшІагылуа уыс рнапІыцІшазтын.

7.12. Ашта хъвшара йалакву райззара щаквыргылра нанауахвырныс йахвитпІ ауи ашІыпІа хъвшараква йалырхыз аделегатква райхІарагІв йа (шІыпІа хъвшара аланамкІуазтын) а-Конгресс йалата ашта хъвшара ашвъа йану райхІарагІв алазтын. АнапІщтІыхци ащаквыргылра нахвщи йара ашта хъвшара йалакву райззара йылнахитІ.

7.13. Ашта хъвшара йалакву йызкъазууым райззара арат ашвхІаусыгІваквала йазырда ауаштІ:

- ашта хъвшара асовет ащаквыргылрала;

- а-Конгресс йалата ашта хъвшара апны ашвъа йанкву йрыуата хпа йчпата закІы рацкІыс ймачІгІвымкІва мачвы зцІарцІаз атшазынархарала;

- а-Конгресс ЙхІаракІу асовет ащаквыргылрала;

- а-Конгресс ашІыпІа хъвшара асовет агІаджвыквцІарала.

7.14. Ашта хъвшара йалакву райззarakва рбжъара ашта хъвшара анхара унашва ахъызцІауа ашта хъвшара асовет аунашвачпагІв дызхъаду ашта хъвшара асовет акІвпІ.

7.15. А-Конгресс ашта хъвшара асовет ръанатІаквала а-Конгресс ашІыпІа хъвшараква рсоветква рунашвачпагІвчвагыи алазлитІ.

7.16. Ашта хъвшара асовет алачІвараква йшатахъхауа апшта, ауаса сквшбжакІ апны зны ацкІыс ймачІымкІва йакІвшалитІ. Ашта хъвшара асовет ащаквыргылраква ауи йалакву ръарагІвшара ацкІыс ймачІгІвымкІва йаъазтын йхътІу напІщтІыхрала йнарахвитІ, рыцІа щардагІвы напІы ззыщтІырхыз ажва алситІ.

7.17. Ашта хъвшара асовет:

а) а-Конгресс ашІыпІа хъвшараква рыхъызла зъарагІв алазлуш щаквнаргылитІта а-Конгресс ашта хъвшара йалакву райззара азнаддитІ, ауаъа уыста йызлапшуаш лнахитІ;

б) ашта хъвшара йалакву райззара ащаквыргылраква рырхъйара аднагалитІ йгъи йархъвыхитІ;

в) а-Конгресс ЙхІаракІу асовет ахъыла атшазынархараква йрылапшитІ;

г) ашта хъвшара йалакву райззара ахъгалра йаланакІуа ракІвмызтын ашта хъвшара анхара унашва ахъцІарала датшагъи ахъвдаквцІараква архъйитІ.

7.18. А-Конгресс ашта хъвшара асовет аунашвачпагІв:

а) а-Конгресс ЙхІаракІу асовет АунашвачпагІв йгІайыйтыз азхъацІага швъала ашта хъвшара ахъызла акъралыгІва уысхартакви ажвлара адкІыларакви дрыцынхитІ;

б) ашта хъвшара асовет алачІвараква азиддитІ;

в) а-Конгресс ашта хъвшара йалакву райззари ашта хъвшара асовети злапшуаш ауысква лихитІ;

г) ашта хъвшара анхара йапщылу антахъгъыт ахъвдаквцІараква йырхъйитІ.

7.19. А-Конгресс ашта хъвшара асовет аунашвачпагІв йхъвдаквцІараква йпІатла далымгаскІва а-Конгресс ашта хъвшара йалакву райззара ащаквыргылралала, а-Конгресс ЙхІаракІу асовет азыразызытын, арат ашвхІаусыгІваквала йашІадрис йауаштІ:

а) йхъвдаквцІараква ныйыжъра шитахъула ахІвара швъа йгІвызтын;

б) йхъвдаквцІараква абгата йзымырхъйахуазтын;

в) а-Устав йану ймырхъйузтын, а-Конгресс алазара ахъызла ашвачІвква рымтийрагъи алата;

г) а-Конгресси ашта хъвшари рунашвахъцІара органква ари а-Устав хъгалрата йырнатуа апкъ йтата йнарахвыз ащаквыргылраква ймырхъйузтын;

д) а-Конгресс (ахъвшара) чва гвымха ахъызрысуа йгъи (йа) а-Конгресс амурадкви ахачІвкви йырпшІагылуа уыс йнапІыцІшазтын.

7.20. Ашта хъвшара асовет аунашвачпагІв йхъвдаквцІараква йпІатла далымгаскІва йашІарысра ауыс гІащтІырх йауаштІ:

а) а-Конгресс ЙхІаракІу асовет АунашвачпагІв;

б) а-Конгресс ашта хъвшара асовет;

в) а-Конгресс йалата ашта хъвшара апны ашвъа йану йрыуата хпа йчпата закІы.

А-Конгресс ашта хъвшара йалакву райззара ашта хъвшара ауыс гІащтІызхыз ражва йалапшитІта а-Конгресс ашта хъвшара асовет аунашвачпагІв йхъвдаквцІараква йпІатла далымгаскІва йашІарысра ауысла щаквыргылра нанаухвитІ.

7.21. А-Конгресс йалакву йрыуата ашта хъвшара йаднакІылуа рпхъадзара йгІаквхта ахъвшара йалакву райззара рхъвыхра комиссия йа рхъвыхыгІв хвысквшала йалнахитІ, ауат рпІатла йалымгаскІва рхъвдаквцІараква ашІарысра ауысла щаквыргылра нанаухвитІ.

7.22. Ахъвшара архъвыхра комиссия щаквыргылра нанаухв йауитІ ауи алачІвара апны йалу райхІарагІв аъзтын. Ащаквыргылраква напІщтІыхрала йнарахвитІ, рыцІа щардагІвы напІы ззыщтІырхуа ажва алситІ.

7.23. Ахъвшара архъвыхра комиссия (архъвыхыгІв) ахъвшара млыкврхІарала анхара, хъатачІвырата йаму аъащи ашвъа анцІащи архъвыхитІ (йырхъвыхитІ).

7.24. Ахъвшара архъвыхра комиссия йалакву (архъвыхыгІв) ахъвшара асовет йалакву йгъи ахъвшара анхагІвчва ахъвшара анхара йапщылу ахабарква гІарыквырх йахвитпІ.

7.25. Ахъвшара архъвыхра комиссия йалакву (архъвыхыгІв) ашта хъвшара йалакву йызкязууым райззара азддара ауысла щаквыргыла нарахв йауитІ.

7.26. Ашта хъвшара архъвыхра комиссия йалакву (архъвыхыгІв) анхара (йынхара) ауысла ашта хъвшара йалакву райззара апахъ джъауап йкІитІ.

7.27. Ашта хъвшара анхара сквшыкІ ауацІа зны ацкІыс ймачІымкІва йдырхъвыхитІ.

7.28. Ахъвшара асовет йалу йа ахъвшара анхагІвы ашта хъвшара архъвыхра комиссия далазара йа рхъвыхыгІвта далырх йгъауам.

7.29. А-Конгресс ашыпІа хъвшара рыцІа йхІаракІу унашвахъцІара органа йазалитІ сквшыкІ ауацІа зны ацкІыс ймачІымкІва ашыпІа хъвшара асовет аунашвала йазырдалауа ашыпІа хъвшара йалакву райззара.

7.30. АшыпІа хъвшара йалакву райззара:

а) а-Конгресс ашыпІа хъвшара анхара анархара хъдаква лнахитІ;

б) а-Конгресс ашыпІа хъвшара асовет зъарагІв алазлуш щаквнаргылитІ, ауи йалакву рпІатла йалымгаскІва рхъвдаквцІараква ашІанарыситІ;

в) ашыпІа хъвшара асовет аунашвачпагІв хвысквшала далнахитІ, йпІатла алымгаскІва йхъвдаквцІараква ашІанарыситІ;

г) ашта ахІбачва рсовет, апхІвысква рсовет, чкІвыныргІа руысквала асовет а-Конгресс ашыпІа хъвшара ахъыла йрылазлуш алнахитІ;

д) ахъвшара йалырхуа аорганква ротчетква йрыздзыргІвитІ;

е) ахъвшара акъралыгІва швъа йанцІара ауысла щаквыргыла нанауахвитІ;

ж) йызланакІуа а-Конгресс ашта хъвшара асовет йщаквнаргылыз йазалху апхъадзара йахънамхІвауата ашта хъвшара йалакву райззара аделегатква алнахитІ;

и) ашыпІа хъвшара анхара йапщылу антахъгыт ауысквала щаквыргыла нанауахвитІ.

7.31. АшыпІа хъвшара асовет аунашвачпагІв, асовет йалакву, ашыпІа хъвшара архъвыхыгІв рпІатла намдзаскІва рхъвдаквцІараква ашІадрис йауаштІ:

а) рхъвдаквцІараква ныржъра шыртахъула ахІвара швъа ргІвыта;

б) рхъвдаквцІараква абгата йырзымырхъйахуазтын;

в) а-Устав йану дмырхъйузтын, а-Конгресс алазара ахъазла ашвачІквва рымтийрагъи алата;

г) а-Конгресси ахъвшари рунашвахъцІара органква ари а-Устав хъгалрата йырнатуа апкъ йтата йнарахвыз ащаквыргылаквва дмырхъйузтын;

д) а-Конгресс чва гвымха ахъызрысуа йгъи (йа) а-Конгресс амурадкви ахачІккви йырпшІагылуа уыс рнапІыцІшазтын.

7.32. АшыпІа хъвшара йалакву райззара щаквыргыла нанауахвырныс йахвитпІ а-Конгресс йалакву йрыуата ауи ашыпІа хъвшара ашвъа йану райхІарагІв алазтын. АнапІщІыхщи ащаквыргыла нахвщи йара ашыпІа хъвшара йалакву райззара йылнахитІ.

7.33. АшыпІа хъвшара йалакву йызкязууым райззара арат ашвхІаусыгквала йазырдауаштІ:

- ашыпІа хъвшара совет ащаквыргыларала;

- а-Конгресс йалата ашыпІа хъвшара апны ашвъа йанкву йрыуата хпа йчпата закІы рацкІыс ймачІгІвымкІва мачвы зцІарцІаз аташазынархарала;

- йызланакІуа а-Конгресс ашта хъвшара асовет агІаджвыквцІарала.



7.34. АшыпIа хъвшара йалакву райззара рбжьара ашыпIа хъвшара анхара унашва ахъызIауа ашыпIа хъвшара йалакву райззара апны йалырхуа пышвтдъа йынхауа ашыпIа хъвшара аунашвахъцIарта акIвпI.

7.35. АшыпIа хъвшара асовет алачIвараква йшатахъхауа апшта, ауаса сквшбжакI апны зны ацкIыс ймачIымкIва йакIвшалитI. АшыпIа хъвшара асовет ащаквыргылраква ауи йалакву ръарагIвшара ацкIыс ймачIгIвымкIва йаъазтын йхътIу напIщтIыхрала йнарахвитI, рыцIа щардагIвы напIы зыщтIырхыз ажва алситI.

7.36. АшыпIа хъвшара асовет:

1) ашыпIа хъвшара йалакву райззара азнаддитI, ауаъа уыста йызлапшуаш лнахитI;

2) ашыпIа хъвшара йалакву райззара ащаквыргылраква рырхъйара аднагалитI йгъи йархъвыхитI;

3) а-Конгресс ашта хъвшара асовет ахъыла атшазынархараква йрылапшитI;

г) ашыпIа хъвшара йалакву райззара ахъгалра йаланакIуа ракIвмызтын ашыпIа хъвшара анхара унашва ахъцIарала датшагъи ахъвдаквцIараква архъйитI.

7.37. Шыцта йгIандыршаз а-Конгресс ашыпIа хъвшара асовет аунашвачпагIв ауи зланакIуа ашта хъвшара йалакву райззара апны хвысквшала далырхитI йаргъи йъанатIала а-Конгресс ашыпIа хъвшара асовет унашва ахъицIитI.

7.38. А-Конгресс ашыпIа хъвшара асовет аунашвачпагIв:

а) а-Конгресс ЙхIаракIу асовет АунашвачпагIв йгIайыйтыз азхъацIага швъала ашыпIа хъвшара ахъызла акъралыгIва уысхартакви ажвлара адкIыларакви дрыцынхитI;

б) а-Конгресс ашыпIа хъвшара асовет алачIвараква азиддитI;

в) а-Конгресс ашыпIа хъвшара йалакву райззари ашыпIа хъвшара асовети злапшуаш ауысква лихитI;

г) ашыпIа хъвшара анхара йапщылу антахъгыт ахъвдаквцIараква йырхъйитI.

7.39. А-Конгресс ашыпIа хъвшара асовет аунашвачпагIв йхъвдаквцIараква йпIатла далымгаскIва а-Конгресс ашыпIа хъвшара йалакву райззара ащаквыргылрала арат ашвхIаусыгIваквала йашIадрис йауаштI.

а) йхъвдаквцIараква ныйыжьра шитахъула ахIвара швъа йгIвызтын;

б) йхъвдаквцIараква абгата йзымырхъйахуазтын;

в) а-Устав йану ймырхъйузтын, а-Конгресс алазара ахъазла ашвачIвква рымтийрагъи алата;

г) а-Конгресси ашта, ашыпIа хъвшаракви рунашвахъцIара органква ари а-Устав хъгалрата йырнатуа апкъ йтата йнарахвыз ащаквыргылраква ймырхъйузтын;

д) аорганизация (ахъвшара) чва гвымха ахъызрысуа йгъи (йа) а-Конгресс амурадкви ахачIвкви йырпшIагылуа уыс йнапIыцIшазтын.

7.40. АшыпIа хъвшара асовет аунашвачпагIв йхъвдаквцIараква йпIатла далымгаскIва йашIарысра ауыс гIащтIырх йауаштI:

а) а-Конгресс ЙхIаракIу асовет АунашвачпагIв;

б) а-Конгресс ашта хъвшара асовет;

в) а-Конгресс ашыпIа хъвшара асовет;

г) а-Конгресс йалата ашыпIа хъвшара апны ашвъа йану йрыуата хпа йчпата закIы.

А-Конгресс ашыпIа хъшара йалакву райзара ауыс гIащIызхыз ражва йалапшитIа ашыпIа хъшара асовет аунашвачпагIв йхъвдаквцIараква йпIатла далымгаскIва йашIарысра ауысла щаквыргылра нанаухвитI.

7.41. АшыпIа хъшара йалакву райзара ашыпIа хъшара архъвыхыгIв хвысквшала далнахитI, ауи йпIатла далымгаскIва йхъвдаквцIараква ашIарысра ауысла щаквыргылра нанаухвитI.

7.42. АшыпIа хъшара архъвыхыгIв ахъшара млыкврхIарала анхара, хъатачIвырата йаму аъащи ашвъа анцIащи ййрхъвыхитI.

7.43. АшыпIа хъшара архъвыхыгIв ахъшара асовет йалакву йгьи ахъшара анхагIвчва ахъшара анхара йапщылу ахабарква гIарыквих дахвитпI.

7.44. АшыпIа хъшара архъвыхыгIв ашыпIа хъшара йалакву йызкъазууым райзара аздарра ауысла щаквыргылра найахв йауитI.

7.45. АшыпIа хъшара архъвыхыгIв йынхара ауысла ашыпIа хъшара йалакву райзара апахъ джъауап йкIитI.

7.46. АшыпIа хъшара анхара сквшыкI ауацIа зны ацкIыс ймачIымкIва йдырхъвыхитI.

7.47. Ахъшара асовет йалу йа ахъшара анхагIвы ашыпIа хъшара дархъвыхыгIвта далырх йгъауам.

## **8 астатIа. А-КОНГРЕСС АХЪВКIЪЫДАКВИ АУЫСХАРТАКВИ**

8.1. А-Конгресс ЙхIаракIу асовет ащаквыргылралла ахъвкIъыдакви ауысхартакви гIанырша йауитI.

8.2. АхъвкIъыдакви ауысхартакви юрист хъата змам а-Конгресс йахъвыдата йалитI. Ауат а-Конгресс йачIвыта млыкв рыртитI, даргьи рынхара а-Конгресс ЙхIаракIу асовет йарыбагъъаз ахъвкIъыдакви ауысхартакви руысла аъащаква рыпкъ йтата йадыргалитI.

## **9 астатIа. А-КОНГРЕСС АХЪАТАЧIВЫРА**

9.1. Акъраль апны йаъу ахабзаква рыпкъ йтата а-Конгресс йара йачIвыта тдзы, уыхвара, бзазарта, транспорт, нхага, ъамапсыма, культура-арыпхъара, спорт йгьи згIвадарахчара нархара зму млыкв, ахча, акция, антахъгъыт хвы зму ашвъабыгъьква, датшагьи анхара аднагалра ахъазла йатахъхуш ари а-Устав йгIанахIвауа млыкв амазла йауитI.

9.2. Амлыкв хабзала йызчIву а-Конгресс (юрист хъатата) акIвпI. А-Конгресс йалата а-Конгресс зымлыкв (алазара ахъазла ашвачIвквагьи анахъанат атичIвквагьи алата) азтыз ауи амлыкв ауысла хъатачIвыра хвитнагIа гърымам.

9.3. А-Конгресс амлыкв йагIалцIыртата йалитI:

а) ауагIа йаларцIауа ахча;

б) алазара ахъазла йгьи антахъгъыт ашвачIвква;

в) ангIалралла йакIвнаршауа ауысква йгIаргуа ахъахIара;

г) ахIаракъатчпара (агIвыма къральква рыцынхарагьи алата) йгIанагуа ахъахIара;

д) а-Устав йшгIанахIвауа апшта йакIвнаршауа алекцияква, агIарбартаква, алотереяква, аукционква датшагьи ауысква йгIартнахуа;

е) ахабза узызнарыхвитуа датшагы агІалцІыртаква.

## **10 астатІа. А-КОНГРЕСС АЛАЦА ПСАХРА ЙГЫИ ЙАЛЫЦТХРА**

10.1. Айззара ду ащаквыргылрала а-Конгресс ахабза йшгІанахІвауа апшта алаца рпсах йа йалырцтх йауаштІ.

10.2. А-Конгресс алаца айззара ду ащаквыргылрала йырпсахитІ, кворум аъата йакІвшаз айззара йалаз рыуа хпа йчпата гІвба ауи ахъазла напІы щтІырхызтын.

10.3. А-Конгресс алаца анырпсахра а-Конгресс ахвитнагІаквагы аборчквагы шалу ахабза йшгІанахІвауа апшта ауи атарала йгІандыршауа ахыбла йахъыситІ.

10.4. А-Конгресс айззара ду ащаквыргылрала йалырцтхитІ, кворум аъата йакІвшаз айззара йалаз рыуа хпа йчпата гІвба ауи ахъазла напІы щтІырхызтын. А-Конгресс ахабза апкъ йтата асуд ащаквыргылралагы йалырцтх йауаштІ.

10.5. А-Конгресс аналырцтхуа алыцтхрала комиссия гІандыршитІта а-Конгресс ауысква алыргарала ахъвдаквцІараква зымгІва ауи йнанауахвитІ.

10.6. А-Конгресс аналырцтхуа ауи хвы азнамтийуата йгІанарысабапырныс йа багыандата йгІартыз амлыкв шабгу йызчІву йрыртхитІ, йара а-Конгресс йачІву ахчакви амлыкви, швачІвыта йакву зымгІва аныршвара амцтахъ, а-Устав йгІанахІвауа ахачІвква рырхъйара ахъазла йгІадрысабапитІ. ЙгІанхаз амлыкв шгІадрысабапуа ауысла алыцтхрала комиссия ащаквыргылра апечать йгІаквырцІитІ.

10.7. А-Конгресс йалази ауаъа йынхузи руысла ашвъаква ахабза йшгІанахІвауа апшта акъралыгІва швъахчарта йартитІ.

## **11 астатІа. АРИ А-УСТАВ АПСАХРАКВИ АНАРХЪАГАКВИ АЛАЦАРА**

11.1. Ари а-Устав псахри нархъаги алацІара ауысла ащаквыргылра А-Конгресс айззара ду йарыбагыитІ, кворум аъата йакІвшаз айззара йалаз аделегатква рыуа хпа йчпата гІвба ауи ахъазла напІы щтІырхызтын. А-Устав йаларцІаз апсахракви анархъагакви ахабза йшгІанахІвауа апшта ашвъа йанцІара атахъыпІ, ауат ашвъа йананырцІара амцтахъ хабзала къару рымата йырпхъадзитІ.